

٢٠١٤ / ١ / ١٤

الحد

فضائية للإنتاج الفني

FADHAIYA ART PRODUCTION



مسرحية الأطفال الهادفة

الأخوين

والشهير

تأليف وإخراج: علي سلطان

تليفون : ٤٦٧٥٠١٨ - فاكس : ٤٣٥١٢٧٥ - جوال : ٥٥٦٩٦٩٥ - ص.ب : ١٥٩٥ الدوحة - قطر

Tel. : 4675018 - Fax : 4351275 - G.S.M : 5569695 - P.O.Box : 1595 - DOHA - QATAR

E-mail : fabhaiya@hotmail.com

شخصيات المسرحية

١. الأمير حسان

٢. الأمير عدنان

٣. الوزير ويصه

٤. شجن

٥. أم شجن

الفصل الأول

المشهد الأول

(بداية المسرحيه مقدمه غنائيه في سوق المدينه ، يظهر من خلالها الباعه والمشتريين يرددون الاغنيه وهم فرحين ، وفي نهاية الاغنيه يحدث **BLACK OUT** مع تشكيل للمجموعه مكونين نصف دائره وعليهم بقعة ضوء ، فتخرج المجموعه من البقع و يظهر الوزير وهو قاسي الوجه ثعلب ماکر وهو مدلول الشر في المسرحيه)

الوزير : لا مايصير حاكم المدينه وانا موجود ... انا الوزير ويصه عندي القوه والذكاء والدهاء أخلي واحد مثل الأميرحسان يصير حاكم وأقوله سيدي لا يمكن .. حسان وعدنان انا اللي امعلمهم على فنون السيف والمبارزه يعني انا أقوى منهم .. بعدين هذا حسان صغير على الحكم .. انا أوله منه .. انا لازم أصير الحاكم .. بس شلون .. شلون .. والمشكله اذا اتحد حسان مع عدنان يكونون قوه ما أقدر عليها .. لانه حسان يمتاز بالذكاء والحكمه .. و عدنان يمتاز بالسيف وفنونه .. فلازم افرق بينهم .. لازم .

(**BLACK OUT** مع ضربه موسيقيه ، خروج الوزير والعوده الى السوق)

بائع ١ : الحرير الياباني عندي .. والصوف الانجليزي عندي .. القطن المصري عندي .

بائع ٢ : تعال وشوف هذا العقد من اللولو الخليجي .. والعقد هذا من العقيق اليماني .

بائع ٣ : لوحات فنيه بريشة كبار الفنانين مثل بكاسو و مايكل انجلو ..

باسعار خياليه .

(دخول شجن مع امها ، وتحمل شجن بيدها سلة فراوله)

شجن : تعالي يمه نقعد اهنيه .

أم شجن : بس اهنيه ما انضايق احد يا بنيتي يا شجن .

شجن : لا يمه .. مكانه بعيد عن المحلات .. وما اظن انضايق احد ..

(مناديه مبتدأه البيع) الفراوله الطازجه والخلود .

مشتري : بكم الفراوله يا بنيتي .

شجن : السله بدينارين يا عمي .

مشتري : وايد .. ما يصير بدينار .

شجن : دينارين سعر مناسب .. وبعدين دينار ما يسوى التعب يا عمي .

أم شجن : ميخالف يا بنيتي بيعيه .

شجن : بس جدي انخسر فيه يا يمه .. (للمشتري) عمي تشتري بدينار

ونص .. توكل على الله .

مشتري : بدينار ماكو غيره .

شجن : ساحنا يا عمي .. ما يصرف .

مشتري : على هواك (ينصرف) .

أم شجن : الله يسامحك يا شجن .. جان بعتي الريال وفكيتينا .. احسن لنا

من الدوارد من صباح الله خير واحنا نفتر .. ارويلاتي قامو

يعوروني .

شجن : ميخالف يا يمه تحملي شويه .. ان شاء الله يرزقنا رب العالمين

مشتري احسن منه .

أم شجن : تدرين أشلون يا بنيقي .. على راحتك .

شجن : (مناديه) الفراوله الطازجه الحلوه .. الفراوله .

(يدخل حرس الوزير وينتشرون بالسوق ، محدثين هرج ومرج وجلبه ، ثم يدخل الوزير ويصه) ..

الوزير : (بسطوه وجبروت) آبس .. سمعوا يا أهل المدينه قرار من الحاكم الجديد .. بفرض ضرائب على كل تاجر .. ورسوم على الدخول والخروج من وإلى المدينه .. ودفع كل تاجر أغنام ثلاث غنمات على كل عشر روس .. بامر الحاكم الجديد الأمير حسان .

بائع ١ : (بخوف) يا خضره الوزير ويصه .. الحاكم السابق ما كان ياخذ ضرايب علينا .. وما عمرنا عرفناها .. هذا شي جديد علينا .

الوزير : من اليوم وطالع .. قصبن عليكم تدفعون الضرايب بامر الحاكم الجديد .. وأول الضرايب (يمد يده ويأخذ بعض قطع القماش ويرميهم إلى الحرس) هذيل مصادرين بامر الحاكم الجديد .

بائع ٢ : هذا ظلم ما يصير جذي تاخذ بضاعت الريال .

الوزير : ظلم ها .. (يمد يده ويأخذ العقود ويرميها إلى الحرس) وهذيل بعد مصادرين بامر الحاكم الجديد (يذهب إلى البائع ٣) وانت قول ظلم ولا منت راضي على الوضع ؟

بائع ٣ : يا معود راضي .. وبسوي اللي يأمر فيه الحاكم الجديد .

الوزير : عدل هذا الكلام الحلو اللي يونس .. شفتوا شلون صاحبكم ما اعترض على شي .. (يمد يده ويأخذ اللوحات ويرمي بها إلى الحرس) انا الحين يجربك .. وأخذ اللوحات الجميله هذي واصادرها .

بائع ٣ : يامعود اعطيك بداهم فلوس .. هذي اللوحات ثمينه .
الوزير : (مقاطعاً) بس ولا كلمه .. ها اشوفك رديت بكلامك ..
(للمجاميع) سمعوني عدل .. اليوم حفل تتويج الحاكم الجديد الأمير
حسان .. وهو عازكم كلكم .. (بحث) ادري وحاس شتقولون
بقلبكم .. ما نبي انخضر حفلة حاكم ظالم .. كيفكم انا ما الومكم
.. وانتو بعد لا تلوموني .. انا عبد المامور يقولي نفذ انفذ .

(تقع عين الوزير على شجن ويدها سله الفراوله ، يتجه ها)

الوزير : شنو هذا اللي بيدك ؟

شجن : فراوله .

الوزير : ادري فراوله .. (ياخذ السله) ما تدرين انه الفراوله ممنوعه بالسوق
بامر الحاكم الجديد .

شجن : هذي غير سالفه .. حتى الفراوله ممنوعه .. هذي فاكهه .

الوزير : (بعصبه) بس لا ترددين علي .

شجن : لا برد عليك .. لانك ماخذ حقي .. والساكت عن الحق شيطان
اخرس .. ارجوك لو سمحت عطني السله او عطني ثمنها .

الوزير : (بتهكم) يا سلام .. البنت جداً مؤدبه .. بكم سعر السله ؟

شجن : بدينارين .

الوزير : دينارين .. ها دينارين ... هذي السله مصادره بامر الحاكم الجديد .

شجن : انا ما يمشي عندي هالكلام .. انا ابي حقي .. و لازم آخذه .

الوزير : (بعصبه) بس ولا كلمه .. بعدين هذا بامر الحاكم الجديد .

شجن : هذا بعده ما صار حاكم ومن اولها قاعد يظلم الناس .. شلون لو

تتوج حاكم .. شيبسوي فينا !

الوزير : انتي السانج وايد طويل .. يا حرس أخذوها السجن .
أم شجن : (تتدخل) لا ولي يرحم والديك .. هذي بنيتي وحبيبتى لا تحرميني
منها .. واحنا آسفين وسلة الفراولة حلال عليك .. بالعافيه .

شجن : لايمه ..

أم شجن : (مقاطعه) بس ولا كلمه .. اذا حضرة الوزير قال امر انفذه
(موجه كلامها للوزير) يا وزيرنا الهمام نرجو منك السماح ..
و مثل ما قتللك بالعافيه عليك الفراولة .. (لشجن) يله يا بنيتي
شجن نمشي وامرنا لله .

الوزير : اوقفوا .. وين رايجين .. ما دفعتموا ضريبت الفراولة .

شجن : بعد ندفع ضريبه .. ليش ؟

أم شجن : (مقاطعه) سكيتي يا بنيه .. (للوزير) الضريبه كم يا وزيرنا
الضرغام .

الوزير : انتي وايد خوش مره .. دائما تمدهيني .. بوزيرنا الهمام والضرغام
.. وهذا المدح يونسني .. قلتوا سلة الفراولة بدينارين مو جذي ؟
أم شجن : نعم يا وزيرنا الصمصام .

الوزير : (كأنه يحسب) الضريبه خمس دنانير .

شجن : على شنو خمس دنانير !

أم شجن : (مقاطعه) سكيتي لا اكسر هالعصى على راسك .. (للوزير)
.. يا وزيرنا يا ابن الأكرام .. ما عندنا خمس دنانير نعطيك ..

كل اللي عندي دينار وربع .

الوزير : (بسخرية) دينار وربع .. خليههم لك .. تدفعين الخمس دنانير
لا آخذ نبتك بأمر الحاكم الجديد .

أم شجن : (بحسره) لا حول الله .. من وين اجيب له هذا خمس دنانير ..

شجن : (مقاطعه بحزم) يمه ما ندفعله ولا فلس .. وخل ياخذني معاه ..

انا ودي اواجه الحاكم الجديد .. واقوله بوجهه انت ظالم ..

(للوزير) انا مستعده أروح معاك على شرط أقابل الحاكم .

الوزير : (يتدارك الوضع) لا انتي زودتيها .. ترى وايد شايقه نفسك ..

انا علشان امك هالي قاعده تمدحني ساكت عنك .. (لأم شجن)

سكتيها يا أم شجن لا تروح منك شجن .

أم شجن : (لشجن) انا عيزت منك .. ليش ما تسكتين وتخليني اتفاهم مع

وزيرنا المقدام .

الوزير : اذيتينا ترى .. تبين تدفعين ولا شلون .

بائع ٢ : (يتدخل) بتدفع يا وزير ويصه .. هاك هذي الخمس دنانير .

الوزير : (للمجموعه) وانتوا .. الحاضر يعلم الغايب .. من اليوم وطالع

ماكو الا الحزم والشده .. بامر الحاكم الجديد .

(يخرج الوزير ويصه ومعه الخرس ، وتتجه أم شجن الى ناحيه خروج الوزير

وتقول بصوت منخفض)

أم شجن : يا وزير الظلم والظلام .

شجن : (باستغراب) يمه .. توك تمدحينه .. يا الهمام ويا المقدام وهو ما

يستاهل هذا الكلام .

أم شجن : شسوي يا بنيتي خايفه عليك .. فلازم أهدي الأمور وأساير

هالويصه .

شجن : يا جماعة الخير هذا الوضع ما ينسكت عنه .. لأنه هذا الشي جديد

على مدينتنا .. الحاكم الجديد الأمير حسان أوامره وقراراته ظالمه .

أم شجن : (بخوف) سكتي يا بنيتي لا يسمعونك .
بائع ١ : كلام شجن عدل احنا مالا لازم نسكت على الظلم .
شجن : هذا الحاكم بدايته جدي .. طبعاً اذا سكتنا وسلمنا بالأمر الواقع
بيتماده بظلمه .. وجبروته .. وطغيانه .. فاحنا لازم نقول للظالم
.. ظالم بوجهه .

BLACK OUT

(نهایه المشهد الأول)

الفصل الأول المشهد الثاني

(تفتح الاضاءه على قصر حاكم المدينه ، وفي وسط المسرح كرسي الحكم والزينه معلقه في ارجاء القصر ، وعلى اليمين باب يؤدي الى داخل القصر ، وباب على اليسار يؤدي الى خارج القصر ، وباب في الطرف الأيسر وهو الباب السري للقصر)

الحاجب : (منادياً) الأمير عدنان .

(يصاحب دخول الأمير عدنان مؤثر مناسب ، وخلفه المريه)

عدنان : (بتذمر) ما بي أتريق هذا الريوق .

المريه : شنو ناقصه يا وليدي عدنان ؟

عدنان : مو ناقصه شي .. بس انا ما أحبه .

المريه : انت قولي شنو اللي تحبه وانا اسوي لك .

عدنان : ما بي شي .

المريه : على هواك (ثم بالخروج فيستوقفها عدنان) .

عدنان : داده أم الخير .. ياريت تقولين حق سايس الحصن يجهز حصاني علشان بطلع شوي .

المريه : ما يصير يا وليدي تطلع وانت مو متريق .. ما يصير تطلع على يوع .

عدنان : (بعصبه) أي ما بي أكل قصب .. روحي سوي اللي قلتلك عليه ولا تكثرين حكي .

(تخرج المريه باحراج)

الحاجب : (منادياً) الأمير حسان .

(يدخل الأمير حسان ويصاحبه مؤثر مناسب)

حسان : انت شفيك تصارخ من صباح الله خير .. ليش ما جيت تتريق .

عدنان : ما أحب هالريوق .

حسان : احمد ربك وشكره اللي انعم عليك بهالنعمة .. غيرك مو محصل
كسرت خبز .

عدنان : ونعمة بالله يا خوي حسان .. ما قلت شي .. لكن ماني حاب
اكل .

حسان : شنو اللي ما تحبه البيض .

عدنان : أي ما أحبه .

حسان : اكل جبن .

عدنان : ما أحبه .

حسان : انزين غسل .

عدنان : ما أحبه .

حسان : قيمر .

عدنان : ما أحبه .

حسان : حليب .

عدنان : ما أحبه .

حسان : انت كل هالأشياء المفيده ما تحبها .. عيل شنو تحب .. بالعكس

البيض فيه بروتين والحليب والقيمر والجبن فيهم كالسيوم يقوي

العظم .. والغسل اللي يشفي الجسم من أي مرض .. بعيد عنك

الشر .

عدنان : خل سالفة الريوق وخلنا بشي أهم .

حسان : شنو الشي الأهم ؟

عدنان : تتويجك .

حسان : على فكره كل شي جاهز لاحتفال اليوم؟

عدنان : لا تحاتي الوزير ويصه جهّز كل شي .. تستاهل يا خوي يا حسان ولا يقلك الكرسي .

(الوزير ويصه مختبأ ويسترق السمع)

حسان : ياخوي يا عدنان الكرسي هذا تكليف مو تشریف .. ولازم من

هل المكان أسعد أهل مدينتي الطيبين .. وحاول اني ما أخلي فقير

في المدينة الا واغنيه.. ووفرله المسكن المناسب.. ويساعد الضعيف

وانصر كل صاحب حق .. وأنشر العدل في المدينة .. وأزرع في

مدينتنا المحبه والسلام.. والأمن والأمان.

عدنان : أي ياخوي بس اللي يقعد على هالكرسي لازم يكون حازم

وشديد .. وانت مع الأسف عاطفي زياده عن اللزوم .. يا ريت

أنه مكانك (يستدرك) عفواً .. انا قصدي ..

حسان : (مقاطعه) فهمت قصدك يا عدنان .. الحزم والشده على قولتك

لهم وقت .. وبوقتهم تلقاني شديد وحازم .

عدنان : على كل حال مبروك وألف مبروك .. وانا أخوك وذراعك اليمين

.. وسيفك اللي تحارب فيه أعدائك .

حسان : كفو يا عدنان .. وهذا مو جديد عليك .

عدنان : أخ يا ريتني مكانك .. جان شفت شسوي .

حسان : خلاص با عدنان أتنازلك وسو اللي تبيه .

- عدنان : (بنجل) لا ياخوي .. قاعد اتغشمر معاك .. حتى لو بسوي شي بسويه وانت الحاكم .
- حسان : بس أكون راضي عليه .. والشئ هذا ما يضر أحد .. اسمحلي أقولك يا عدنان .. تراني بالحق ما أعرف أخوي أو ولد عمي .
- عدنان : كفو يا سيدي يا حسان .. وهذي أخلاق وتريه أبونا وأمنا .. ربونا على الأخلاق الحميده .
- حسان : (بتهكم) قول حق نفسك ما تبي تتريق .. وتصرخ على دادة أم الخير .. هالمسكينه مرييتك .. هذي ظروفها خلتها بالوضع هذا .. ترضى لو أنت مكانها .. يصرخون عليك ويزفونك .
- عدنان : (بخرج أكثر) انا آسف ياخوي .. ما أكررها مره ثانيه .
- حسان : (بمداعبه) يا سلام .. عدنان انخرج مسكين .. ياالله عن الحركات اللي حافظها منك .
- عدنان : (بتردد) بخاطري شي .
- حسان : حلو .. اريوق .
- عدنان : لا .. بطلبك طلب .. بس ارجو انك ما تردني .
- حسان : قول اطلبك .. اذا أقدر عليه عيوني لك .
- عدنان : تسلم عيونك يا خوي .. أيبك تبارزني (يسحب سيفه ويوجهه في وجه حسان) .
- حسان : (بحزم) انا ماوافقت علشان تسحب سيفك .. وترفعه بوجهي .
- عدنان : (يتزل سيفه ورأسه بنجل كبير) آسف مره ثانيه .. وحقك علي .

حسان : (بارشاد) انت خوش ولد يا عدنان .. بس عيبك متسرع ..
وما توزن الأمور بعقلك .. وتحكم على الأشياء بمزاجك .. الخطأ
يا عدنان مو عيب .. لكن تكرار الخطأ اهو اللي عيب .. (بحب)
والحين ارفع سيفك .. مالي أكسر بخاطرك .. أدري فيك اتغلبني
.. لكن مستعد أبارزك .

(يتبارزان حسان و عدنان ، الى ان عدنان يسقط سيف حسان)
عدنان : ها شرايك بالحركة اللي طيحت سيفك فيها ؟
حسان : (بحبه) بصراحه انت بالمبارزه أحسن مني .. وانت الحين غلبتني
.. وهذي محسوبه لك .. لكن علشان تغلبني أو نتعادل .. بسألك
سؤال .. انت غلبتني بالرياضة البدنيه صح .

عدنان : صح .
حسان : فسؤالي بالرياضة الذهنيه .. الفكرية .. اللي تشغل المخ .
عدنان : اسال بس لايكون السؤال صعب .
حسان : مو صعب اذا فكرت عدل وشغلت مخك .
عدنان : تفضل قول .
حسان : السؤال يقول :! شنو اهو الشي اللي الصبح يمشي على أربع ..
والظهر يمشي على اثنين .. وبالليل يمشي على ثلاث ؟
عدنان : (يحك رأسه) ها .. الصبح على أربع .. والظهر على اثنين ..
و بالليل على ثلاث .. هذا .. هذا .. ما أدري .
حسان : اعصر مخك .. واذا تعبت قول سلمت .
عدنان : (يفكر) اف .. تعبت وسلمت .. شنو هالشي ؟
حسان : الحين اعترف انه تعادلنا .

عدنان : (وهو مبتسم) معترف .. قول شنو ؟

حسان : اهو الانسان .. الانسان في بداية عمره يمشي على أربع .. يعني يجي على ادينا ورجوله .. واذا كبر شوي يمشي على رجوله الثنتين .. واذا شيب يمشي على رجوله الثنتين مع العكازه يصيرون ثلاث .

(يدخل الوزير ويصه مسرعاً ، فيذهب حسان ويجلس على الكرسي وعدنان يقف عن يمينه)

الوزير : (بنفاق) ميروك يا سيدي حسان .. ميروك .. تستاهل يا حاكمنا .. انا فرحان .. (يتصنع البكاء) هذي دموع الفرح .

حسان : شكراً يا وزير ويصه .. قولي كل شي جاهز للاحتفال .

الوزير : من غير ما تتحكي يا سيدي .. معقوله فرحتنا بتويجك اليوم ما يجهر كل شي .. (يهمس باذن عدنان) ياريتك مكانه .

عدنان : (بتعجب) ها !!

الوزير : ارقد وآمن يا سيدي .. انا مرتب حفله تليق بمقام حاكمنا الجديد .

حسان : وعزمت كل أهالي المدينه من صغير وكبير ومن غني وفقير ؟

الوزير : سيدي بصراحه انا عزمت الكل .. لكن ..

عدنان : (مقاطعاً) لكن شنو ما اتحكي ؟!

الوزير : في الحقيقه .. ما ادري شقول .

حسان : صاير شي يا وزير ويصه ؟

الوزير : (بنجث) ما أحب أكدرك .. وانت فرحان بالتويج .

حسان : قولي شغلت بالي .

عدنان : (بنرفزه) انت علامك متردد تقول شصاير .

الوزير : (بدهاء) بقول لكن أرجو من سيدي يتمالك أعصابه .. ولا أقولك .. انسى الموضوع .

عدنان : (بعصبية) وبعدين معاك .. ما تتكلم .. بطيت كبدي .. شصاير .

حسان : هدي يا عدنان خلنا انعرف شسالفه .

الوزير : (بمكر لعدنان) ما ألومك يا سيدي عدنان .. تحب اتعرف وانا

بعلمك .. (يتجه الى حسان بتصنع) انا رحت السوق علشان

اعزم الناس .. وبلغتهم واحد واحد .. لكن الأكثرية قالوا لي ما نبي

نجي الحفله .. قتلهم ليش .. قالوا ما .. ما ..

عدنان : ولين .. رد على ما .. ما .. اشقالوا ؟

الوزير : قالوا ما نبي هالحاكم الجديد .

(ضربه موسيقيه ، وتعجب من حسان) .

حسان : ما ييوني .. ليش انا شمسوي لهم .. بالعكس انا أحبهم .. وبسوي

لهم كل خير .. وبكون للأصغر مني ابو .. ولي في عمري اخو ..

ولي أكبر مني ولد .. ما ييوني ليش .. ما جربوني علشان يحكمون

علي .

الوزير : (هامساً لعدنان) أخوك وايد عاطفي .. ياريتك مكانه .

عدنان : (بتعجب) ها .

الوزير : (بدهاء) يا سيدي حسان انا ما حببت أضيق خلقك لكن انت

أجبرتني .. واللي أكثر من جدي يا سيدي قالوا لي ليش ما ييونك

.. بس ما أبي أضيق خلقك .

حسان : لاحول لله .. تقط حكوتك وتشغلني فيها وبعدين تقول ما بي أضيق

خلقك .

عدنان : (بعصبية مكبوته) شوف عاد .. بتتحكى وتقول ليش ما ييون

حسان حاكم .. ولا بتشوف شي ما يسرك .

الوزير : قالوا يا سيدي وما استحواء.. انك نذير شأم .

(ضربه موسيقية)

حسان : (باستغراب) نذير شأم .

عدنان : (مستغرباً أيضاً وهو ينظر لحسان) نذير شأم .. شنو هالسخافه

.. أنت لازم تعاقبهم يا حسان على هالكلام .. وانا لازم أسأل عن

هالسالفه .

الوزير : سيدي حسان .. خلنا الحين بفرحتك وبحفلة تتويجك .. (لعدنان)

وبعدين أسأل عن هالسالفه.. تفضل ياسيدي اقعد على الكرسي

.. دخلو المعازيم .

(يذهب حسان باتجاه الكرسي ويتبعه عدنان ويقف على يمينه يدخل المعازيم

وينتشرون بالمرح) .

الوزير : (يخطب بنفاق) أيها الحفل الكريم .. اليوم يوم فرح وسرور ..

بمناسبة تتويج حاكمنا الجديد الأمير حسان .

(تنزل أغنية تناسب الحفل ، وفي نهاية الأغنية المعازيم يباركون لحسان

ويخرجون خارج المسرح ، ويختبأ الوزير ويصه خلف الكرسي ، ويبقى حسان

وعدنان) .

حسان : كانت حفله جداً جميله .. لو ما سالفه أهل المدينه اللي شاغله

فكري .

عدنان : (باهتمام) سيدي لا تشغل فكرك .. بعرفلك الكلام هذا صج ولا

كذب .

حسان : ان شاء الله يطلع كذب علشان قلبي يرتاح .. على العموم انا داخل اريح شوي .

عدنان : الله معاك يا سيدي .

(يخرج حسان ويبقى عدنان لوحده ينظر لكروسي الحكم ، ثم يذهب الى الكروسي ويتردد بالجلوس عليه ، و فجأه ينزل " **PLAYBACK** " جمله الوزير " يا ريتك مكانه " ، فيجلس عدنان على الكروسي مع نزول اضاءة المسرح باستثناء بقعة على الكروسي) .

عدنان : (بحيره) انا اصير مكانه .

(يخرج الوزير ويصه من خلف الكروسي مثل الحيه الرقطاء)

الوزير : ليش لأ .. انت أحسن منه .

عدنان : انت شقاعد تقول .

الوزير : (بمكر) أخوك عاطفي وما يصلح للحكم .. شوفت عينك ..

شففت أشلون سكت عن اللي قالوا ما بيونه .. فانت الأنسب .

عدنان : (بتردد) لا يا وزير .. لا يمكن آخذ مكان أخوي .. أبوي وصانا

و انت تدري بأنه الحاكم بعده حسان .

الوزير : (بتحريض) بس مع الأسف ما يصلح .. الكروسي هذا لك انت

.. أنت اتمشي أمور المدينه بقوتك وحزمك وشدتك .. وتكون

الحاكم اللي ينقذ المدينه من الضياع .

عدنان : انزين وحسان .

الوزير : أواخره عن دربك .

عدنان : شلون .

الوزير : أقولك .

(BLACK OUT + موسيقى الفواصل يتداخل معها أصوات هرج ومرج الحرس وهم يدخلون ويخرجون من المسرح كأنه حدث شيء ما ، والاضاءه خافته الى المنتصف وفي هذه الأثناء يدخل حسان)

حسان : (لأحد الجنود) شصاير .. شفيكم تتراكضون جدي .

أحد الجنود : أهل المدينه اهجمو على القصر .

حسان : شنو .

(يدخل الوزير وخلفه عدنان) .

الوزير : (متصنع الفزع والخوف) سيدي حسان اطلع من القصر ..

ترى أهل المدينه متجمعين عند القصر ويطالبون انك تطلع من

المدينه .. فاطلع يا سيدي بكرامتك الحين قبل لا يهجمون عليك

ويطلعونك قصب .

حسان : انا لازم أواجههم .

الوزير : لا يا سيدي تراهم معصبين وشايشين .. فمواجهتهم فيها

خطورة عليك .. انا أقول تطلع أحسن .. ولا شرايك يا

يا عدنان .

(عدنان يهز رأسه بتأييد الوزير على مضض) .

حسان : رايك يا عدنان اني اطلع .

(ينظر له عدنان ويطأطأ برأسه الى الأرض) .

الوزير : (وكأنه بعجله من أمره) سيدي ماكو وقت انضيعه .. لازم

تطلع .. واذا هدى الوضع .. انطرش عليك .

حسان : (بتعجب) عدنان ليش ساكت .. قول شي .

عدنان : (بمراره) اسمع كلام الوزير .

حسان : هذا رايك .

عدنان : (يشيح بوجهه عنه) مع السلامه يا خوي .

الوزير : يله يا سيدي اطلع من الباب السري . *الشيخ الجريح*
(يخرج حسان وهو ينظر الى عدنان الذي مطرق برأسه الى الأرض ، والوزير
يتجه الى عدنان وهو يمشي مشيت تبختر وانتصار) .
الوزير : مبروك عليك الحكم .

" BLACK OUT "

{ نهاية الفصل الأول }

الفصل الثاني

المشهد الأول

(يفتح المشهد الأول في بستان ، فيدخل المسرح حسان ويتبعه حرس الوزير)

أحد الحرس : اوقف مكانك .

حسان : (باستغراب) ها .. انتو ليش لاحقينني .. وساحبين سيوفكم

علي .. روحوا القصر يمكن الوزير يحتاجكم .

أحد الحرس : بسرعه ولا تكثر حكي .. نبي خاتم الحكم .

حسان : ليش ؟

أحد الحرس : أوامر الوزير ويصه .. ناخذ منك الخاتم .

حسان : ويصه أمركم بجذي .

أحد الحرس : أي نعم .. لا تفتكر هجوم أهل المدينه على القصر صج ..

هذي خطه بين الوزير ويصه وأخوك عدنان .. علشان

يعدونك عن الحكم .. وهم يستولون عليه .

(ضربه موسيقيه)

حسان : (بتعجب) خطه من ويصه وأخوي عدنان .. عدنان أخوي

يتآمر ضدي .. ما أصدق .. مستحيل .. شقاعد أسمع .

أحد الحرس : مثل ما سمعت والحين عطنا الخاتم وخلصنا .

حسان : ما أعطيكم الخاتم لو مهما كلفني الثمن .

أحد الحرس : حياتك مقابل الخاتم .

(يتبارز حسان مع الحرس ويتمكن أحدهم من اصابت حسان في هذه الأثناء
يهجم بعض أهل المدينة ومعهم شجن، فيهرب الحرس ويقع حسان على الأرض)

BLACK OUT

المشهد الثاني

(تفتح الاضاءه على القصر و الوزير جالس على كرسي الحكم ويقف أمامه
بعض أهل المدينة ، و من بينهم أم شجن) .

الوزير : (لأم شجن) ليش منتي راضيه تدفعين ثلاث أرباع محصولك
لنا ؟

أم شجن : أهو المحصول من كثره علشان أعطيك ثلاث أرباعه .. والسنة
على حظنا محصولنا قليل .. شيقالي انا وبنتي .. واشلون أقدر
أبيع منه وأسدد ديوني .

الوزير : هذي مشكلتك .. انا سألتك سؤال جاوبيني عليه .. ليش منتي
راضيه تعطينا ثلاث أرباع محصولك ؟
أم شجن : على ما أعتقد أنا أتكلم عربي .. جان انت ماتعرف عربي هذي
مشكلتك .

الوزير : شنو .. قاعده تتطنزين علي بعد .. حلو .. حلو .
أم شجن : مو شرحتلك موضوعي .. منت راضي تفهم .
الوزير : (باقتضاب) بعد ما أفهم .. يا حرس .. صادرو المحصول كله
وصادرو أرضها .. وقطوها بالسجن .

أم شجن : ليش يا الظالم .. يلي ما تخاف الله .. هذا ظلم .
(يخرجونها الحرس)

الوزير : وانت شنو سالفتك ؟

صاحب سفن : يا حضرة الوزير .. انا عندي خمس سفن .. حرسك صادرو
أربع سفن مني .. وما خلو لي الا سفينه وحده .. لا وقضوها
بعد .. عاد ياريت تعطيني حقي يا وزير .

الوزير : من ناحيه اني بعطيك حقك .. بعطيك حقك .. انت جيت
عند اللي بعطيك حقك .. يا حرس حطوا بوسط سفينته
المقضوضه .. وجروها وقطوها بحر .

صاحب سفن : يا ظالم لك يوم .. حسبي الله ونعم الوكيل .
(يخرج الحرس) .

الوزير : وانتي شفيك بعد ؟

المراه : عندي ثور وبقره .. الثور يحرق الأرض والبقره آخذ منها
الحليب وايعه واجيب اكل حق عيالي .. والحرس خيروني بين
الثور والبقره .

الوزير : وانتي شخترتي ؟

المراه : أثنيهم ما أستغني عنهم .. لا الثور و لا البقره .. فانا ابي
اختيارك يا وزير .

الوزير : تبين اختياري .. بعطيك الاختيار المناسب .. يا حرس .. الثور
و البقره والمره قطوهم بالسجن .

المراه : حرام عليك عندي عيال .. يا الظالم .. يا عدم الذات .

(يدخل عدنان في أثناء ما الحرس يسحبون المراه ، فيستوقفهم ويخلص المراه
من يدهم) .

عدنان : هدوها يا الله .. شسالفه .. شفيها يا ويصه .. اشفيك أختي .

المــــرأه : (بخوف) خذوا مني حلالى وبقطوني بالسجن .. هذا مو ظلم.
عدنان : ليش جدي يا ويصه .. هذي مو أول وحده تطري الظلم ..
أكثر أهل المدينه يصروخ مظلومين .. ليش جدي تسوي ليش .
الوزير : (بعدم مبالا) مو لازم الحزم والشده انطبقهم ؟
عدنان : الحزم والشده نستخدمهم في وقتهم .. مو نظلم الناس باسم
الحزم والشده .. (لنفسه) الله يذكرك بالخير يا خوي حسان
هذي كلمتك .. والحين رجع حلال المره وخلها تروح حق
عيالها .

الوزير : هذا مو شغلك .

(ضربه موسيقيه)

عدنان : شلون مو شغلي .. وبعدين ليش قاعد على كرسي الحكم ..
قوم هذا مو مكانك .

الوزير : (بكبرياء) ونس نفسك .. راحت عليك يا الحبيب .. هناك
أول اللي تامر وتنهي .. الحين انا اللي اوله بالحكم منك يا سيد
عدنان .. بعت أخوك علشان توصل .. وهذي نقطة ضعفك
اللي جيتك منها .. الحين اخيرك بين شائتين .. يا انك تقعد
مثلك مثل الحرس اللي بالقصر ولا تروح وري أخوك .

عدنان : (بقهر) كفو .. عفيه عليك يا ويصه .. لعبت لعبه قدره ..
واتحسب بتنجح لعبتك .. حامض على بوزك .. ما أخليك .

(يسحب عدنان سيفه و يتبارز مع الوزير ويصه ، فيسقط عدنان سيف ويصه
ويسقطه على الأرض ويوجه السيف نحوه) .

الوزير : (يصرخ) يا حرس .. لحقوا علي .

(يتكاثر الحرس على عدنان موجهين له رماحهم ، فيلقي بسيفه ويستسلم فيقوم ويصه من الأرض ويتجه ناحية عدنان بنشوة المنتصر) .
الوزير : (بتهكم) يا سلام عليك يا بطل .. تدريبي لك ما راح بوش .. تفوقت على استاذك .. قطوه بالسجن .

BLACK OUT

المشهد الثالث

(تفتح الاضاءه على البستان ، الفلاحين يغنون وهم يعملون فيخرج حسان من العشه وهو معافى فيشارك الفلاحين الغناء والعمل ، وفي نهاية الأغنيه تدخل تدخل شجن المسرح) .

شجن : الحمد لله على السلامه يا ..

حسان : حسان .. الله يسلمك يا ..

شجن : شجن .

حسان : عاشت الأسامي يا شجن .

شجن : تسلم .. حبيت أسألك و ارجو انك اتجاوبني بصراحه .

حسان : تفضلي سألتي .. وبجاوك بصراحه .

شجن : سمعت من بعض الفلاحين .. يقولون انك الأمير حسان ..

صح هالكلام ؟

حسان : أي نعم .. صح .. انا الأمير حسان .

المجموعه : الأمير حسان .. هذا الأمير حسان .

شجن : (مقاطعه المجموعه) يعني انت الحاكم الجديد ؟

حسان : أي نعم .

شجن : اسمحلي أقولك .. كانت امنيتي أشوفك من زمان علشان أقولك كلمه وحده وبوجهك .

حسان : شنو ؟

شجن : مع الأسف .. أنت ظالم .

(ضربه موسيقيه) .

حسان : (بتأثر) ظالم .. شلون حكمتي علي باني ظالم .. انا ما أعرفك ولا تعرفيني .. شلون ظللمتك أو ظللمت أي واحد من أهل المدينه .

شجن : بقراراتك اللي اصدرتها قبل لا تتوج حاكم كلها ظالمه .

حسان : (بتعجب) أي قرارات .. وشنو اصدرت .. شعنه تتحكين .

شجن : ارجو انك اكون صريح ولا تتغيشم .

حسان : الله يسامحك .. صدقيني انا ماني عارف شعنه تتحكين .. وضحيلي ارجوك .

شجن : انت ما اصدرت قرار بفرض ضرائب على أهل المدينه ؟

حسان : (بتعجب) انا .. هذا مو صحيح .. متى اصدرت قرار مثل هذا .. ومن منو سمعته .

شجن : من وزيرك ويصه .. جانه السوق و صادر بضائع الناس بامر الحاكم الجديد .

حسان : ويصه سوى جدي .. (يفكر) الله الحين عرفت كل شي .. هذا القرار من ضمن الخطه اللي سواها الوزير .

شجن : خطه .. شخطته .. يعني الحين انت بتخطها براس ويصه ؟

حسان : لا صدقيني .. صدقوني يا أهل المدينة الطيبين .. انا ضحية
مثلكم .. الوزير ويصه دبر مكيدة علشان تكرهوني .. وهو
فهمني بانكم ما تبوني حاكم بحجة اني نذير شأم .

شجن : أحنأ ما قلنا عنك نذير شأم .. ولا قلنا ما نبيك .. واهو بعد
فهمنا بانه هذي القرارات الظالمة صادرة منك .

حسان : (مدافعاً عن نفسه) صدقوني مو صحيح .. بدليل أنكم شفتو
حرس الوزير .. كانوا لاحقين علشان ياخذون خاتم الحكم ..
لكن الحمد لله لحقتو علي وأنقذتوني .. وانا ما أنسى لكم هذا
الجميل .. بس انا اللي قاهرني وحاز بنفسي .. شلون أخوي
عدنان اللي ما كنت أفكر يوم من الأيام أفترق عنه .. يصير
ضدي ومع عدوي .. الله يسامحك يا عدنان .

(تنزل أغنيه عن الأخوه ، وتخفت الاضاءه ماعدا بقعة ضوء على حسان
وبقعة ضوء على عدنان وهو بالسجن وكأنه أسير ، وبقعة ضوء حمراء على
كرسي الحكم والوزير ويصه جالس عليه ، وفي نهاية الأغنيه نعود الى مشهد
البستان) .

شجن : سيدي حسان .

حسان : ها ..

شجن : وين سرحت .

(يدخل أحدهم)

أحمد : يا سيدي حسان .. الوزير ويصه سجن أخوك عدنان ..
وسجن أمك يا شجن .. وباكر بسوي احتفال تتويجه .. وبعين
نفسه حاكم المدينة .

حسان : يا أهل المدينه اتضحت الصوره .. الوزير سوى هالخطه علشان
يعدني عن الحكم ويستولي عليه .. فهو السوسه اللي فرق بيني
وبين أخوي عدنان .. فياجماعه .. لازم نتحد ضد هذا الظالم ..
وانخلص الناس من شره .. يا شجن أبي منك اتعينين كم واحد
من الشباب الطيبين يبلغون أهل المدينه بان نكون على قلب
واحد ضد الوزير ويصه .. وتبلغينهم بالخطه اللي بقولها لك .
شجن : أحنا كلنا تحت أمرك يا سيدي حسان .. يعيش الأمير حسان .
المجموعه : يعيش الأمير حسان .
حسان : (يتقدم مقدمه المسرح) هين يا ويصه .. اذا انت بدهاءك
ضحكت علي .. فانا بعقلي بغلبك .. واللي يضحك بالأخير
يضحك كثير .

BLACK OUT

المشهد الأخير

(تفتح الاضاءه على القصر ، ونشاهد الوزير ويصه جالس على كرسي الحكم
وامامه الأمير عدنان مربوط بالقيود ، فيقوم ويصه من مكانه ويتجه نحو عدنان) .
الوزير : يا سلام يا عدنان .. اليوم بتوج حاكم على المدينه .. وعيونك
تشوف .. يا سلام يا عدنان .. امنيتي تحققت واستوليت على
الحكم .

عدنان : أرجوك رجعي السجن .. ما أحب أشوف تنويج واحد مثلك
.. السجن ارحملي من وجهك .
الوزير : - ليش حبيبي عدنان .. لازم تشوف التنويج علشان تحتر و تنقهر .

عدنان : يا عديم الوفا هذي وصية ابونا لك .. وهذا وعدك له بانك
تكون لنا الحارس الأمين وتدير بالك علينا .

الوزير : (يتصنع البكاء) لا تذكرني يا عدنان تراك قطعت قلبي .. عمي
أي وصيه وأي ابوك .. انا كنت حاط براسي شي ووصلته
.. ووعدني لأبوك كله حكي ماخوذ خيريه .

عدنان : نسيت شنو كنت يا ويصه .. ما كنت اتدور اللقمه ومننت
لاقيها .. شافك أبوي وأخذك ورباك وعلمك وكبرك وحطك
وزيره .. هذا جزاه .

الوزير : بس.. بس انطم .. ابوك يكون له الشرف اني انا ويصه وزيره .
عدنان : ماكو فايده فيك .. منكر حسنه .

(الوزير يتجاهل عدنان متجهاً الى عمق المسرح منادياً أحد الحرس) .

الوزير : يا حارس .

الحارس : نعم سيدي .

الوزير : وين الفرقة .. ليش تأخرت ؟

الحارس : ألحين أشوفهم لك سيدي .

(يخرج الحارس)

الوزير : عدنان .. انا بشرف على الأكل داخل .. اذا جات الفرقة ..
عطهم عصير .. ها ها .. ها ها .

(يخرج الوزير) .

عدنان : يا ملقك .. دمه ثقيل .. (يقلده) اذا جات الفرقة عطهم

عصير .. (بحزن) وينك يا خوي حسان ؟؟؟

(في هذه الأثناء نرى حركه غير طبيعيه للحرس بتغييرهم ، مع دخول الفرقة
وبينهم حسان وشجن متنكرين بزي هندي ، وفي نفس الوقت يدخل الوزير) .
الوزير : أهلاً وسهلاً .. تأخرتو .

حسان : (ولكنه هنديه) أحنا آسفين على التأخير .. يا سلام هذا قصر
جداً جميل .

الوزير : تحبون تعيشون فيه .. وتصيرون فرقة القصر الخاصه .
حسان : بنعيش فيه قصباً عليك .
الوزير : ها .

(تتدخل شجن لتتقذ الموقف ولكنه هنديه أيضاً)

شجن : يقصد ياريت نسكن فيه .
حسان : يا .. أنت شنو أسمك ؟
الوزير : ويصه ثعلبه .

(حسان يتجه الى عدنان ، بينما الوزير ويصه منشغل بالحديث مع شجن) .

حسان : (بهمس) شلونك يا خوي عدنان ؟

عدنان : (بتعجب) منو .

حسان : أخوك حسان .

عدنان : حسان ..

حسان : أش .. أش .. يله يا سيد ويصه نبتدي الحفله ؟

الوزير : لحظه خل أقعد على الكرسي .

حسان : مؤقت ان شاء الله .

الوزير : شنو ؟!

شجن : (متدخله) قصده مبروك .. مبروك .

الوزير : شكراً .. يله ابتدو الحفله .

حسان : سيد ويصه .. هذا ليش مربوط ؟

الوزير : أنت شعليك منه ؟

حسان : لا مايصير أحننا نغني وهو مربوط .. لازم يفرح ويصفق ..

اشلون يصفق وهو مربوط .. وبعدين ما يبي ينحاش .. الحرس

موجودين دار مداره .

الوزير : يعني هذا اللي تبونه علشان اتغنون .. يا حرس فكوا عدنان ..

بس خلو عينكم عليه .

(يأتي أحد الحرس ويفك عدنان) .

الوزير : الحين ارتحت ؟

حسان : واجد .. واجد .. بنتدي .. ون .. تو .. ثري .

(تنزل أغنيته يتغنى بها حسان و عدنان ، ونرى الوزير ويصه فرحاً ، والمجموعه

ترقص رقصه استعراضيه مناسبه للاحتفال ، وفي نهاية الأغنيه يسحب حسان

وعدنان سيوفهم على الوزير بعد ان يكشف حسان عن شخصيته ، يتفاجئ

الوزير) .

حسان : ويصه ..

الوزير : (بتعجب) حسان .. يا حرس قبضوا عليهم .

حسان : حرسك راحو يا ويصه .. هذيل الحرس اللي شايفهم .. أبناء

المدينه الطيبين .

عدنان : (بعصبية) قوم عن الكرسي .. لأنه مو من حقك .. مشيراً

الى حسان) هذا صاحبه .

الوزير : ما أقوم منه مهما يصير .

عدنان : بتقوم قصباً عليك .
الوزير : (متشبثاً بالكروسي) ما أقوم .
حسان : بتقوم بحد السيف .
(يتبارز الوزير مع الأخوين وفي النهايه تكون الغلبه لحسان وعدنان ، يقع الوزير على الأرض ، ويهم عدنان ليضرب ويصه بسيفه فيحول حسان دون ذلك) .
حسان : لا يا عدنان ..
عدنان : خلني ابرد قلبي فيه ياخوي .. اهو السبب بفراقنا .
الوزير : (بدهاء) حرام عليكم اتسوون فيني جذي .. انا مثل عمكم .
عدنان : ما يشرفنا واحد مثلك يكون عمنا .
الوزير : (برجاء مصطنع) يا ريت اتسامحوني .. انا آسف يا سيدي حسان .. وسامحني يا سيدي عدنان .. انا ندمان على اللي سويته .. وانتو بعد يا أهل المدينه سامحوني .
حسان : أحنأ بنسامحك .. بس انطالك ترحل عن مدينتنا .. لأنه ما في مجال للشـر يعيش بينا .. واذا لقيناك في مدينتنا مره ثانيه .. يصير لك شي موزين .
الوزير : هذا آخر كلام عندك .
حسان : مثل ما سمعت يا ويصه .
عدنان : يله فارح وما نبي نشوف رقعة وجهك .
(يتزل الوزير الى يسار المسرح بخيـت أمل) .
الوزير : تطردوني من مدينتكم .. هين .. برجع لكم مره ثانيه .
(يخرج الوزير الشرير ، و من ثم تدخل أم شجن) .
أم شجن : شجن .. وينكم يا حبيبي ؟

شجن : كاني يمه .. الحمد لله على سلامتكم .. ندمت بمرور سنة تفاع
دمي : يمه يمه الحمد لله على سلامتي .. عطيني ..
حسان : الحمد لله على سلامتكم يا أم شجن .. (يتجه الى عدنان الذي هم

أخذ ركن من المسرح) .. ليش واقف بروحك يا عدنان ؟

عدنان : (بخجل) مالي وجه أخط عيني بعينك ياخوي .. مستحي منك

.. سامحي يا حسان .

(يتعانقان ويكي عدنان) .

حسان : بس ياخوي .. انا مسامحك .. ودمعتك غاليه .. دريت بانه

السوسه هذا اللي اسمه ويصوه .. اهو السبب .. لكن مع الأسف

يا عدنان بسرعه قدر يقص عليك ويفر مخك .. (للمجموعه)

وهذا اللي صار درس لنا كلنا والواجب علينا أنكون واعين لمثل

هذي الأمور .. ونكون قلب واحد و ايد وحده وبنيانا مرصوص

.. علشان لا يدش بيننا سوسه مثل هذا يفرقنا و يخرّب أمنه

واستقرارنا .

(أغنية الختام)

{ نهاية المسرحيه }

THE END

تمت بحمد الله